

## Christliche Reichpredig.

nach dem Exempel des H. Davidts/der sagt im 101. Psal.  
Ich hab gern fromme vnd getrewe Diener: Ein verkehrt  
Herk muß von mir weichen/ früh vertilge ich alle Gottlose/  
aus dem Lande.

Wie ein Redlich vnd Aufrichtig Gemüth hat ihre  
Gnaden gehabt/ *Cornelius Tacitus* schreibt/ von den Sitten  
der Alten Teutschen/ wie daß sie seind gewesen/ Warhafftis-  
ge/ Redliche/ Aufrichtige Leuth/ freundlich/ holdselig/ die  
ob Recht vnd Gerechtigkeit steiff gehalten/ ihr Wort war/  
Ja das Ja sollte sein/ vnd Nein/ das Nein sollte sein/ Da  
hieß es: Ein Wort ein Wort/ ein Mann ein Man/ in der  
warheit ein solcher Redlicher/ Aufrichtiger Alter Teut-  
scher ist mein gnädiger Herz auch gewesen/ solten ihr Gna-  
den einem etwas verheissen/ vnd nicht gehalten haben/ D  
das hetten sie nimmermehr gethan/ sie hetten auch gewißlich  
nichts verheissen/ wann sie es nicht hetten halten können/  
Wie ein vbel gefallen haben ihre Gnaden an denen ge-  
habt/ die sich viel außgethan vnd vermessen haben/ vnd ha-  
bens nicht gehalten.

Es möchte aber einer allhie sagen: Wie ist ihm dann  
Prediger/ wilt du dann gar einen Engel auß deinem Gnä-  
digen Herrn machen? hierauff antworte ich/ D nein/ gar  
nicht/ dann wir wissen gar wol/ daß ihr Gnaden kein Engel  
in disern Leben gewesen/ sondern von natur/ gleich wie alle  
Menschen/ ein grosser vnd armer Sünder: es haben ja ihr  
G. ihre fehl/ mängel vnd gebrechen auch gehabt/ das wissen  
wir wol/ auch haben ihre G. solches wol erkant/ auch allezeit  
mit auffgehabnē Augen vnd seuffzē solches beklaget: ja ich  
kan mit warheit sagen/ daß ich niemals/ so lang ich bey ihr  
Gnaden